

**■ GLOSSA**

# «Mis Dach isch de Himmel vo Züri»

DA SILVIO CAMENISCH

Stoss jau, dr. cuss. naz. Vordenker und Vorlenker Mörgeli, mussar stringentamain mes miserabel attest da lavur a mes nov patrun? Dastg'ins strenscher uschia il culiez a mai cun la cravatta? Uschia betg. Jau sun daventà andetgamain dischoccupà, depatrià. «Mis Dach isch de Himmel vo Züri und s'Bellevue mis Bett won i pfluus, und d'Schöpfe mis Bänkli und s'Central mis Schränkli...». Ins i na pudess cuir a nagin, o bain, a la lavurusa ambiziusa manzegnusa Eveline pudess ins, vules ins!

Mes attest da lavur è uschia insatge sco miserabel, sco inacceptabel, excellent è insatge auter, retschavì hai jau quel dad in Condrau. Scherm, per betg dir verm (Wurmfortsatz) da la buna famiglia da Condraus da nossa veglia Gasetta Romontscha, insatge sco la «Weltwoche» per la Surselva catolica da lezza giada, na sai jau gnanc? Stuess jau pir far giu la pulvra, zavràr e documentar l'ossa da la buna famiglia u stirpa. Na fashais vus betg in'idea, quanta pulvra ch'è sa tschentada sisur tut ils onns. Betg problematic e ristgà da stuair tusser pulvra il rest da la vita, signur doctor?

Ossa ed ossa, l'entira plaiv, l'areal d'università dadens e dador dad



ossa curclada, er sin tetg e chamin è ella sa tschentada, l'ossa, mo ina fossa resta averta. Da gudagnar in bel premi! In di, dus dis, trais dis cun il curatur e conservatur a far giu la pulvra a l'ossa, zavràr ed emplunar ella tenor criteris e tgenins! da nossa veglia università. Nus dad rtr tschertgain la pli bella pluna d'ossa. Nus mussain ina giada, duas giadas, trais giadas ina bella pluna d'ossa, resguardond per amur da la pasch/paisch, ella è faussa, tuttas etnias linguistics. Plunas.

Jau na ma lasch betg relaschar uschia da mes chef, segir sut ina cuvra cun sanesters, il Hildebrand e l'Eveline. Motto dal di tar quels e quellas è ina giada, duas, giadas, trais giadas il di: «Komm unter meine Decke, und mach es dir bequem». Il rest sa dat lura da sez. Jau mez, tuttina Vordenker e Vorlenker da la dretga extrema Mörgeli, n'hai ni in tetg ni ina cuvra pli, «Mis

dach isch de Himmel vo Züri und s'Bellevue mis Bett won i pfluus», insatge sco voss Valzeina da para requires d'asil. Poss jau guardar, dastg jau vegnir en la WG cun la Natalie, en la Clinica da gaud. Avain nus qua duas cuvras, u dastgain nus ensemen «insieme» sut ina medema? Nus avain la medema malsogna da brischà or, ergo, na pigliain nus betg giu pli in da l'auter.

Mia proxima lavur vegn ad esser quella da tschertgar mes nov patrun, dastga er esser mia nova patruna. Mia partenaria da temp Uni è stada fin dato mia veglia patruna, sa ussa l'entir mund. Sut ella hai jau lavurà 30 pertschient sco curatur e sco conservatur, jau hai dà tut ad ella, na prendì nagut dad ella. In mezcuratur, mezconservatur na sun jau garanti betg stà, jau betg! Tegness ella mai vinavant, vegness jau quella giada cun in ultra mega giga tschitschapulvra SVP, jau pudess gea er vegnir mo cun in spulvrin uschia.

Jau sun dischoccupà, marginalisà, depatrià, sco onest burgais svizzer. Mes miserabel attest malgistun muss jau a mes amis da giassa; almain survegn jau dal Zarli in marun, dal Fredi in mez joint, da la Debbie in entir bitschun sin la bocca ... und d'Nacht isch d'Laterne de Mond mit de Sterne und Züri ganz Züri mis Huus.